

## P. OVIDI NASONIS AMORES.

### LIBER PRIMUS.

#### EPIGRAMMA IPSIUS.

Qui modo Nasonis fueramus quinque libelli,  
Tres sumus: hoc illi praetulit auctor opus;  
Ut iam nulla tibi nos sit legisse voluptas,  
At levior demptis poena duobus erit.

- I. Arma gravi numero violentaque bella parabam  
Edere, materia conveniente modis;  
Par erat inferior versus: risisse Cupido  
Dicitur atque unum surripuisse pedem.  
5 'Quis tibi, saeve puer, dedit hoc in carmina iuris?  
Pieridum vates, non tua turba sumus.  
Quid, si praeripiat flavae Venus arma Minervae,  
Ventilet accensas flava Minerva faces?  
Quis probet in silvis Cererem regnare iugosis,  
10 Lege pharetratae virginis arva coli?  
Crinibus insignem quis acuta cuspide Phoebum  
Instruat, Aoniam Marte movente lyram?  
Sunt tibi magna, puer, nimiumque potentia regna:  
Cur opus adfectas, ambitiose, novum?  
15 An, quod ubique, tuumst? tua sunt Heliconia tempe?  
Vix etiam Phoebo iam lyra tuta suast?  
Cum bene surrexit versu nova pagina primo,  
Attenuat nervos proximus ille meos;  
Nec mihi materiast numeris levioribus apta,